

四庫全書

集部

欽定四庫全書

集部

西山文集卷十九
二十九

詳校官庶吉士臣張溥

主事臣呂雲棟覆勘

總校官降調編修臣倉聖脈

校對官主事臣陳墉

謄錄監生臣朱烱

欽定四庫全書

西山文集卷十九

宋 真德秀 撰

翰林詞草

大禮御札赦文

郊祀大禮御札

勅內外文武臣寮等朕奄宅庶邦于今七閏念宗社纘承之重若涉深淵雖宮庭躩躩之微如對上帝矧當禋

祀尤極嚴恭，邇更中外之多虞，益顯高明之垂佑。銷旱蝗之孽，浸格豐年。洗戈甲之腥，溢為和氣。既訖小康之效，盍崇大報之儀。况嘗游饗於堂筵，茲用恪修於郊類。方將推筭而迎日至，又且奉珪而見雲陽。為百姓以祈，敢云專鄉來諸侯之助。其罔弗欽，爰戒先期，亶孚羣聽。朕以今年十一月二十日，謁款于南郊，咨爾攸司，各揚乃職。相予肆祀，毋或不恭。故茲詔示，想宜知悉。

郊祀大禮赦文

朕以眇躬嗣承先烈今寧王遣我大寶茲持守之甚艱
而上帝監于四方實照臨之有赫居懷兢業罔敢荒寧
自更化之惟新益厲精而加勉一日必謹五年于茲幸
昭受于天休獲鞏安於國步昔羽檄交馳之地今惟玉
帛之往來昔粒食垂罄之民今有京坻之充積豈繫涼
德憂底小康亟詔有司稱秩元祀故嘉薦屢修於重屋
而緝儀久曠於崇丘茲惟其時祇率舊典奉幣而欵真
字灌圭而朝太宮合享兩儀升侑二祖樂備圜鍾之奏

詩歌成命之章象質素於陶匏罷周張於黼黻蓋極天下之物不足報功惟盡內心之誠庶幾克饗有祝史正辭之告無祠官祈福之私高靈顧歆協氣充塞飛靈六出既先事以應期麗日重光復彌旬而開霽雖迄熙成之禮愈勤祇粟之思緬懷慶厯之郊禋恭味仁皇之諭旨除降祥之地而懼采切席已安之勢而念益深大哉聖謨實為可法矧如菲質敢替此心屬當外內無患之餘尤軫夙夜畏威之戒欽念求端而從事莫如尚德以

緩刑其誕布於恩綸庶均霑於帝祉於戲天生民不能
獨治故付予統理之權后非衆罔與守邦宜加乃困窮
之惠惟內之羣工庶尹若外之方國元侯共體好生之
仁俱懷拯溺之念推德意以達于下諏疾苦以告于朝
俾萬物各遂其宜微一夫弗被其澤庶膺眷佑同享丕平

制

觀文殿大學士提舉臨安府洞霄宮吳興郡開
國公錢象祖特授少保加食邑一千戶實封

四 百 戶 令 所 司 擇 日 備 禮 冊 命 麻 制

國家之慶莫盛於建儲人主之恩尤先於篤舊維朕元子誕膺典策之華念我宗臣嘗叅師傅之重厥有明命告於羣工具官錢象祖器度宏深材猷瓌碩坐重俟累將之裔有先正名臣之風其踐政涂非羣議於兵釁驟開之日其登揆席翊萬幾於朕躬親攬之初功名赫奕以不居進退雍容而有裕粵予上嗣正位前星既主鬯之得人肆臨軒而錫命金石在虞協風揚從律之龢播

紳盈庭景曜煥重輪之瑞緬惟黃閣弼諧之老久宣青
宮調護之勞獨興嘆于滯南諒傾心於拱北其加茂渥
以獎舊勳學士象四時仍延恩之邃職孤卿位九棘陟
亞保之歸班珍臺更使領之嚴圭食衍邑封之寵於戲
元良之正萬國夙嘉輔導之功二公之弼一人更藉謀
猷之益勿以爾身之居外而忘臣職之效忠往殫乃心
祇若予訓可特授

皇伯奉國軍節度使開府儀同三司充萬壽觀

使嗣秀王師揆可特授少保加食邑食實封

制

王者建儲立貳所以繫萬國之心備物陳儀所以垂百代之憲故齒胄行而國人化主鬯定而宗廟安既鉅典之崇成宜湛恩之敷錫矧惟伯父夙號賢王其頒制冊之公用聳廷紳之聽具官師揆器資宏裕業履端醇逮事阜陵恩隆猶子之愛受知先考誼均同氣之親而能恪守宮庭動循矩度賜履襲秀園之舊辨儀參宰路之

崇德盛而禮彌恭位高而志愈約朕若稽古訓豫建元
良酌有唐太極之舊規遵至道朝元之故事顧瞻羣彥
紛鷓鷯以充庭有偉宗英儼貂蟬而在列爰加命數以
侈榮懷仍節制於元戎峻等威於亞保以光外朝九棘
之位以煥宗正二星之躔申衍豐租具昭殊眷於戲三
孤之重百辟所瞻弘化弼予雖少異周王建官之舊制
節謹度當毋忘宣尼守貴之言於昭令猷欽對嘉命可
特授

皇叔祖昭慶軍節度使提舉佑神觀嗣濮王不
儔可特授檢校少保加食邑食實封制

建儲所以尊宗廟蓋圖千載之安睦族所以厚人倫期
底萬邦之協朕鑒觀往訓冊命元良既典章文物之一
新斯天地神人之咸悅厥有大賚宜先近親其敷渙恩
用穆師聽具官不儔令猷淵邃雅量冲和早晞沛輔之
賢矜嚴有度晚慕辟強之節清靜自娛以真王紹服於
濮園以大將擁旄於雪水振振信厚蹈承平公姓之風

抑抑威儀蔚昭代老成之望比正前星之位聿彰洵震
之符毓明德而居少陽丕隆國本鋪鴻藻而伸景鑠誕
舉邦彝有偉竒英與陪盛禮爰因繼體之義思廣篤親
之仁締冕冢車俾政叅於寅亮珍臺閔館仍自適於燕
頤增行真奮併昭茂渥於戲大宗維翰朕欲致本支之
強三孤弼予爾尚期名實之稱惟不忘居寵思危之戒
斯無媿以德詔爵之公光昭前聞永有終譽可特授

史彌遠特授正奉大夫依前起復右丞相奉化

郡開國公加食邑食實封制

天下之本在元良左右得賢則萬邦正人主之職論一
相經綸有道則百度修朕蚤建皇儲迄成綽典迺眷股
肱之良弼夙殫羽翼之深功其敷渙恩以詔羣辟具官
史彌遠寬閎而縝栗剛大而粹夷有尊主庇民之誠足
以衛王室有忘身殉國之節可以通神明自持橐於甘
泉即橫經於資善琢磨令範斧藻大猷掃浮雲而開泰
清再康天步導前星而貳宸極益固邦基乃登籌惟乃

穆台宰進則謀謨黃閣以變諧萬化之元退則陪輔青
宮以講明三善之益展也宗臣之望凜乎先正之風屬
載考於上儀當亟褒於中鉉義深體國固無懷寵利之
心賞或忘勞何以示賢能之勸用晉文階之峻申倍井
賦之優於戲日重光而月重輪既丕昭於令德河如帶
而山如礪方首序於元功惟君臣相得之甚艱而事業
當圖於不朽勉攄闕韞庸副殊知可特授

楊次山特授少保進封永陽郡王加食邑食實

封制

朕蚤建儲闈聿修冊禮黃麾設伏眡元會之盛儀鱗翼
充庭奏明安之雅樂班行悚動朝野歡康既闕宗祏之
休宜錫后家之澤維親賢之莫二肆命數之兼崇揚于
大廷告爾多士具官楊次山耆明而肅艾簡靜而裕和
早奮右庠旁貫九流之蘊典晚聯左戚蔚為四姓之儀
刑自膺齋旒繡袞之華久遂閤館珍臺之佚位叅將相
行無改于布韋名在族媼身弗留於輦轂得遠執避權

之體有闔門養重之風惟朕躬親攬於政機顧后德實
多於內助比宣離明繼照之象尤資坤載順承之功典
策告成邦家叶慶若時懿屬可限彛章其登外朝位棘
之尊仍䟽王社苴茅之貴指洞庭之野麾幟不移畫淦
水之陽封疆特大亶為異渥夏掩前聞於戲若古訓言
位祿匪期於驕侈維天明畏謙盈隨示於益虧爾其守
樊侯謹約之規晞寶君退遜之節勉肩忠藎思保寵榮
庶無後艱永有終譽可特授少保進封永陽郡王依前

岳陽軍節度使充萬壽觀使加食邑七百戶食實封三百戶仍令所司擇日備禮冊命主者施行

奏劄

附

臣恭覩陛下以東宮冊禮告成明詔疏恩戚里之賢寵數優隆加以王爵稽諸典故所未前聞然其老成靜重公論素所推予身為外屬而避遠權勢不居京師治家教子風聲凜然誠近世戚畹之所未有意其賢德夙簡聖心故因鉅典之誠特示寵擢臣承命草制亦能推明

陛下所為褒表之意播告中外矣然臣伏觀古今載籍之傳莫不以恩寵太盛為外家之深戒漢世賢戚無出樊宏陰興右者宏之言曰富貴盈溢未有能終天道惡滿好謙前代貴戚皆明戒也興亦有云外戚家苦不知謙退富貴有極人當知止夸奢益為觀聽所譏惟二者其所操持若是故其子孫昌熾世有令聞為史冊之光臣愚竊謂二人之言蓋陛下所當知而戚里所當鑒也夫倚伏無常古今所畏崇猶塵積替若駭機不可不

深圖不可不豫慮伏惟陛下清燕之間省觀樊陰之所由得追跡梁竇之所由失常思所以安全外族俾蒙謙靖之福而不蹈滿盈之咎斯誠宗廟社稷無疆之休臣以非材承乏詞禁官雖甚卑其職則有唐供奉之舊故敢因事陳愚妄希李絳白居易之萬一惟陛下裁赦臣不勝大幸謹具劄子陳奏以聞伏乞睿照

史彌遠特授光祿大夫右丞相兼樞密使兼太

子少師加食邑食實封制

門下朕夙興眊朝夕惕念治攬萬幾而兢業若涉春冰
倚一相以經綸用作霖雨項以安危之寄起于艱疚之
中素冠纓纓既畢禮經之制赤舄几几庸新宰路之瞻
播告大廷咸聽朕命具官吏彌遠清明而莊重宏毅而
粹溫勤相我家世侈旂常之載端誠於國心逾金石之
堅當群枉之橫流仗孤忠而首奮不為禍福之慮獨陳
社稷之言掃袂第於太微乾端澄肅正少陽於貳極震
器尊安陳平之智有餘蕭相之功第一方圖夾輔遽服

私憂蔽自予衷式從權制而能以勤勞熙帝載以寬靖
鎮物情有推賢引類之風有折衝銷萌之畧雖閔騫至
孝欲畢三年之哀而玄齡善謀豈容一日之去矧更吉
制宜舉徽章論道巖廊兼總樞機之要從游儲禁允資
模範之良以井賦則加多以文階則加峻維國舊典匪
予汝私於戲天難諶斯詎敢忘惟幾惟康之戒民亦勞
止盍共圖既庶既富之功朕方愛日以有為爾尚輔予
之不逮四事未施則周公坐而待旦一夫弗獲則伊尹

視如內溝勉行所知無媿前哲

夏震特授武信軍節度使殿前都指揮使進封

加食邑食實封制

門下太微南宮上將拱端門之位羽林北落衆星聯壘
壁之光朕仰觀乾象之文近飭師兵之衛惟予所父捍
我皇家其頒贊書以竦羣聽武康軍承宣使殿前副都
指揮使舞陽縣開國男食邑三百戶食實封一百戶夏
震性資樸重風槩沈雄早振迹於顏行晚策勲於盟府

執戈衛社闕如貔虎之威仗鉞奮忠迅若鷹鷂之擊心
惟奉上誼不辭難遂亞中權遂司留務扈徽道千廬之
邃肅穆無聲領屯營萬騎之嚴訓齊有紀疇其多績錫
以褒章建蜀道之戎麾正巖除之使領豈云假寵于以
勸忠於戲若時將帥之臣蓋無越六旄之貴維我祖宗
之世率以旌百戰之多爾其思恩遇之難疇惜功名之
易老惟廉可以飽士惟公可以服人徃其欽哉勿替朕
訓可特授武信軍節度使進封舞陽縣開國伯加食邑

五百戶食實封二百戶主者施行

夏震除太尉依前武信軍節度使致仕進封武

陽郡開國侯加食邑食實封制

門下授齋壇之鉞方渙號之誕敷挂神武之冠勿需章
之亟上若時虜將厥有駿功茲祈解於殿巖肆進登於
尉府敷我明命告于治朝武信軍節度使殿前都指揮
使舞陽縣開國伯食邑八百戶食實封三百戶夏震少
以勇聞晚由忠顯項屬攬權之始與聞去惡之謀以號

令一衆心若周勃入北軍之日以感慨圖王事若多祚
領羽林之時繇列校而秉中權自廉車而陞留務久總
凝嚴之護甫顯節制之雄而受寵若驚以疾來諗念將
冀呂蒙之愈莫如聽李靖之歸庶休精神以便藥石佩
秦官之印綬式獎爾勞建漢將之鼓旗俾仍其舊胙之
侯爵豐厥圭畚於戲垂車而傳子孫雖已從於閔適闔
門而養威重猶可備於諮謀尚勉衛生毋忘報國可除
太尉依前武信軍節度使致仕進封舞陽郡開國侯加

食邑五百戶食實封二百戶王者施行

皇伯師垂特授少保依前定江軍節度使致仕
天水郡開國公加食邑食實封令所司擇日

備禮冊命制

門下朕倚重天支參扶國棟言念阜陵之近屬存者幾
人有嘉秀邱之象賢蔚其耋老方賴維城之助遽騰謝
事之章告于大廷敷我明命具官師垂器資閱裕德宇
靚深憑宗廟之休光襲父師之餘訓建旌開府富貴無

矜參之心鳴玉會朝進止有安詳之度比典司於屬籍
旋燕佚於祠庭載渴儀刑每塵朝夕龍旂孤羈尚庶幾
伯父之來乘馬路車其敢忘君子之錫胡云抗牘亟請
挂冠所期爾壽而爾昌詎意斯人而斯疾重違其志姑
遂厥私宜陞亞保之班併衍多田之賦於戲若時同姓
實衛我家雖公族枝葉之寢蕃有光前古而老成典刑
之日遠良惻朕心尚體眷懷勉綏福履

吳瓌特授少師致仕加食邑食實封制

門下朕聞仁莫大於篤親義莫先於貴齒惟有周任似
之德終古難忘願中興陰馬之家舊人無幾獨餘一老
父列三孤遽謝事以言歸為披章而太息敷時顯冊告
爾庶工具官吳瓌逮事高皇馮休憲聖以位則絕九卿
之席以屬則先四姓之侯而能敬恭自持終始弗懈退
遜如廣國未嘗以貴而驕人畏謹若樊宏但欲守謙而
全已維太皇之盛烈有大造于我家慈惠宅心端母儀
於四世從容定策贊內擅於三朝追懷保佑之功莫伸

覆載之報幸爾身之未耄猶朕志之少寬迺以疾聞難於詔奪其䟽茂渥俾亞維師元戎秉鉞之雄上公賜履之重悉仍舊服申錫新畬於戲老成國之著龜懿戚予之肺腑今其往矣寧不盡然尚保乘車之榮未忘授几之寵可特授少師依前招化軍節度使華國公致仕加食邑七百戶食實封三百戶令所司擇日備禮冊命主者施行

史丞相回授加恩進封永國公加食邑食實封

制

門下三代之教太子必惟端士之求五等以命諸侯無
越上公之重賤予鼎輔久翊震宮若時祖宗訓謨之書
尤賴朝夕講論之力既聿新於令德宜優答於元功昨
土分封揚庭亶衆具官吏彌遠直方以大明哲而忠昔
保衡作我先王丕昭永世之烈而伊陟格于上帝克篤
前人之休自入侍於甘泉即從游於資善收威柄而尊
王室密贊至謀建儲貳以重宗祧獨陳大議暨秉鈞樞

之任益殫羽翼之誠謂將開迪於英猷莫若參稽於成
憲繇藝祖而至真廟源流一道之相承自治體以及邊
防渾噩百篇之具在肆因誦說時寓箴規俾元良有得
于中猶列聖實臨其上屬周厥帙爰獎爾勞迺屢形考
父之恭期必遂范宣之遜勉貶階品僅衍賦輿踵先正
賜履之邦示奕葉傳龜之寵若太公於齊姬公於魯有
周以表殊勲而呂氏之申韓氏之儀我宋以為盛事載
頌新渥增煥舊聞於戲父子登庸既萃一門之美君臣

相敕當圖千歲之安朕方惟保國之孔艱卿亦念承家
之匪易尚懋播菑之業永堅帶礪之盟

希懌特授昭信軍節度使開府儀同三司進封

制

朕遵列聖之謨厚同姓之禮雖雍容朝謁未嘗責以事
功而焜耀寵名或兼榮於將相矧予法從時乃宗英其
分陝有召公之風其治魯有伯禽之政遽茲告老寧不
疚懷明敎贄書丕聳羣聽具官趙希懌出藝祖神明之

曾擢阜陵俊造之科行若不勝其衣而有任重之器言
若弗出諸口而優經世之材以璿源屬籍之親守圭竇
懼儒之行自綰楚東之印迨持江右之麾恫幅無華慕
漢京之循吏清靜自定師蓋公之至言比奏最於全吳
俾偃藩於姑孰庶幾坐嘯之樂可忘卧理之勞迺貢誠
忱願從閒燕進班奎殿賦祿珍臺曾詔墨之未乾已囊
封之狎至覽觀太息訓諭莫回所期爾壽而爾臧詎意
斯人而斯疾其膺元戎十乘之拜併眎上公九命之儀

以賁菟裘之歸以昭麟趾之寵於戲維今人才難得之
日有若公族間出之賢非獨鎮撫侯邦賴翰垣之重抑
亦夾輔王室倚枝幹之彊顧中道以退休拊予衷而增
慨尚其冲嗇對此褒庸可特授昭信軍節度使開府儀
同三司致仕進封天水郡開國侯

建武軍節度使充鄂州駐劄御前諸軍都統制
王喜加食邑食實封制

門下朕躬展南郊之盛禮賸懷西土之功臣雖軍國異

容莫與執籩之列而戎祀大事盍均授脰之恩渙是明
倫孚于衆聽具官王喜性資粟銳風際沈雄窺玉帳之
竒蚤研窮於機畧扼銅梁之阻晚震愴於威名誠存金
石之堅功耀旂常之載久總戎於順政旋易戍於武昌
紀律精明足以厲三軍之氣笑談整暇居然折千里之
衝屬予拜况於中壇念汝宣勞於外閫用荒采邑俾洽
神釐於戲朕敬於事天爾當視以爲尊君之法朕仁於
惠下爾當推以爲撫士之方益懋勳庸永綏福祿

隨龍保成軍節度使提舉萬壽觀譙令雍加食
邑食實封制

門下朕詠曲臺之文展園丘之祀敢言菲德足膺皇皇
后帝之歆獲迄曠儀實賴肅肅辟公之相迺瞻龍潛之
舊厥有駿奔之勞其敷詔恩以洽邦慶具官譙令雍温
恭而有恪博譽而好修自我先皇伴從游於朱邸迨予
初載久司謁於彤闈當春知未愍之時抗廉靖無求之
節齋壇煥寵恍閱周星祠官清心澹如一日視勢權若

將浼已處富貴不以驕人屬祇薦於明裡俾肅陪於嚴
衛念西鄰之禴祭受福既多豈南陽之故人疏封可後
其因舊履更啟新畬以廣欽柴之釐以旌伐木之助於
戲賜爵於廟王者之至公事君如天人臣之明誼往堅
素履式對鴻休

皇叔師禹除檢校少傅制

門下朕蒐飭禮樂變和神人惟國家更化以來未皇大
報賴天地降祥之應屢獲豐年三垂晏清七政明潤迺

御齋輅迺升嘉壇侍祠數百人咸肅雍於漢時同姓五十國疇表倡於周盟有偉者英實叅薦獻其盼贊冊以告昕廷具官師禹志行潔修性資凝粹黃流玉瓚挹之而有芬馨清廟朱絃澹然而諧律呂屏驕倨貴游之習迪忠純厚德之風自擁驛旄久安珍館雖疏北闕之朝謁每問東平之起居比躬太祐之祠歷裸孝宗之室緬懷遺烈等覆載之難窮環顧近親慨老成之無幾矧予忘祀嘉乃同寅其進眠於孤卿併增陪於采邑上以體

皇祖篤宗支之念下以伸冲人尊叔父之心於戲受福而不敢康王者所以承丕命居寵而弗自溢人臣所以永令名朕方堅畏威時保之誠卿其懋作德日休之戒尚惟哲艾毋竦訓言可特授檢校少傅依前皇叔保康軍節度使提舉佑神觀充秀安僖王園令兼秀王位檢察尊長天水郡開國公加食邑五百戶食實封二百戶主者施行

吳琰除檢校少保制

門下朕諏曲臺之儀肆園丘之祀鳴鑿夙駕喜景氣之
曠暄奠璧宵昇仰月星之明禱靈族來格熙事備成惟
泰元尊既授漢皇之策賜伯舅胙宜均周室之恩其頒
贊書以穆師聽具官吳琰馮休四姓際遇三朝遠勢避
權蚤踐樊陰之躅頤神養素晚師黃老之言飭躬期媿
美於前修教子蔚為於時用比展宗祊之謁永懷祖后
之慈瞻長信之宮尚存遺範訪渭陽之里今鮮近親克
有典刑維時耆艾屬歲祠於八陛賴留衛於九重載嘉

忠勤宜厚寵秩叅華孤棘之貴行食輟疇之豐匪狗予
私蓋均帝祉於戲歌成命之頌朕方勤夙夜以緝熙誦
外戚之箴爾尚鑒古今之成敗惟上下共繇斯誼則邦
家永孚于休諒惟老成毋竦訓告可特授檢校少保依
前保信軍節度使提舉佑神觀廣陵郡開國公加食邑五
百戶食實封二百戶王者施行

皇伯師揆少傅奉國軍節度使充萬壽觀使嗣
秀王食邑五千九百戶食實封二千一百戶

特授少師依前奉國軍節度使充萬壽觀使
嗣秀王加食邑食實封仍令擇日備禮冊命

制

門下朕倚重天枝叅扶國棟念昔仁祖獨優荆卽之賢
若時秦陵尤厚益王之禮蓋明德莫如睦族而貴老為
其近親延睦者英宜加異數其敷典冊以諭臣工具官
師揆挺信厚之姿蘊醇明之度風流紹其世美標望冠
于宗盟爵為真王位列孤傳年高七袞德齒皆謂達尊

身歷三朝恩禮莫之與比緬懷憲靖夙著忠純惟功在於我家故慶流於後嗣顧高陽之八子今僅幾人在建初之四王最為稱首念典刑之足尚豈命秩之可稽進貳師垣陪輸采邑於戲錫爾多福匪顯示於私恩屏余一人政有資於遺老尚綏眉壽式對龍光

詔

淮東湖南江西三路盜賊作過除賊首合行收捕其餘脅從等人並從原貸許以自新各令

復業仍仰州縣多方賑卹詔

勅門下朕以眇身君臨方夏明有未燭德有未孚項緣
誤國之臣妄動開邊之釁科役煩重人不聊生旱蝗頻
仍吏弗加卹使吾赤子多轉徙以無依而彼姦民因誘
怵而為暴靖言致寇敢昧責躬近而淮楚兩郡之間遠
則江湖數邑之地生齒或遭其蹂躪屋廬或至於燬焚
惕若興懷為之肝食今禁旅揚威而並進鄉豪勦力以
爭先震疊無前蕩平有日言念脅從之衆豈皆好亂之

氓弄潢池之兵諒非爾志烈崑岡之火亦豈予心與其
假息以偷生孰若轉禍而為福在昔乾道淳熙之際有
若李金陳峒之徒雖暫結於蜂屯卒莫逃於鯨戮自有
宇宙至于今日未聞盜賊得以全軀想惟爾衆之習知
豈待朕言而後諭今則宏開禁網誕布寬書推予不殺
之仁畀爾更生之路倘復舊業即為良民棄兵弩持鉤
鉏苟知舍逆而效順問田疇卜居宅當俾去危而即安
尚惟郡縣字人之官共宣朝廷惠下之澤亟除民瘼庸

副朕心其楚州衡柳吉州南安軍等處盜賊作過除賊
首合行收捕外其餘脅從等人如能解散歸投並從原
貸各令復業許以自新仍仰州縣多方賑卹故茲詔示
想宜知悉

科舉詔

勅門下朕惟我祖宗張設科目以網羅天下之彥虎臣
碩輔多此涂出庶幾乎三代選舉之意朕以涼菲獲承
丕緒所與共天位治天職者非一時賢士大夫乎故自

踐阼以來凡數下賓興之詔思得英傑協圖康功而前者權臣崇飾私意淵源醇正之學斥之為偽忠亮顛切之言嫉之若仇繇是士氣鬱而弗伸文體浸而不古肆朕更化之後息邪說以距詖行闢正路而徠忠規四海之士聞風興起既有日矣今茲大比爾多士其各抒所蘊試于有司賢書來上朕將親策于廷以備器使詩不云乎鳶飛戾天魚躍于淵豈弟君子遐不作人朕之激昂士類蓋與周之先王同出一揆爾多士其可不勉自

澡濯以副招徠之意乎故茲詔示想宜知悉

自而前者
至徠忠規

六十四字為叅政婁機
貼去重改今但存初本

答詔

賜太中大夫權戶部尚書兼詳定勅令官沈誥

辭免除戶部尚書兼職依舊日下供職恩命

不允詔

勅具悉古者以大道生財以儒術富國故大司徒教職也而貢賦屬焉意深遠矣維今急務邦用最先然知取

而不知予舍道而一于權則人無自存君孰與足故朕於地官之事非儒者不以付之卿學問深博為時聞人久踐計省蔚有成績肆予酌之師言命卿為真常伯豈直以是為卿寵哉損上益下之宜理財正辭之義卿益講之熟矣其益推行所學使君民兼裕以庶幾盡徹之意此朕所望於卿者顧何以辭為所辭宜不允

賜朝議大夫試尚書禮部侍郎兼太子右庶子

兼同修國史兼實錄院同修撰汪達辭免除

吏部侍郎恩命不允詔

勅具悉維乃先正以直道謹言侍從我烈祖著在國史
號為名臣顧朕不及見之矣風流未遠有子而賢學問
淵源克守家法剛毅之氣擯抑不衰肆予更化之初命
趣造朝之駕資其直清故使典朕禮倚其道誼故使輔
吾兒然猶慙焉慮進用之未亟也若時文部繫爾世官
其以家庭講貫之規施諸人物銓衡之際顧誠餘事焉
用多辭所辭宜不允

賜朝散大夫試尚書兵部侍郎兼同修國史兼
實錄院同修撰兼太子左庶子戴溪辭免除
太子詹事日下供職恩命不允詔

勅具悉朕深惟萬世之本莫重元良博選一時之英俾
司輔導若時詹省實亞賓筵必擇其人欲使聞仁義道
德之要必顯其職庶幾陪居處出入之親以卿夙號鴻
儒首參鶴禁綿歷歲時之久養成德性之尊與其贊貳
司戎尚其簿書之責孰若優游端尹日惟經訓之陳用

正厥名豈輕所付當勉承朕志慨慕前修毋徒守於一
謙庶益禪於三善所辭宜不允

賜太中大夫權工部尚書何異乞守本官致仕
不允詔

勅具悉知止遺榮為臣之高致貪賢敬老有國之令猷
蔚以舊人儀于法從年雖耄艾居然視聽之未衰職在
論思非以筋力而為禮盖有三達尊之望初無二宜去
之譏况莫崇乎八座之班而至簡者百工之事縱令自

佚何以過茲與其慷慨懷歸以行義教于鄉里孰若優游在列使名聲重于朝廷勉安厥官毋拂予意所請宜不允

賜武康軍承宣使殿前副都指揮使夏震乞官

觀差遣不允詔

勅具悉朕以卿有衛社之忠整戎之畧擢從環列寄以腹心留務之秩亞于節旄巖陞之權冠于宿衛待遇之意可謂超軼故常矣卿將何以報朕哉惟恭勤弗懈足

以扞王家惟恩威並行足以齊師律則卿不慚於居寵
朕無媿于知人若夫慮忤物之招尤思引年而就佚此
人臣自全之計非古名將所以自期者勉承眷倚毋復
有云所請宜不允

賜正議大夫守兵部尚書兼知臨安府趙師異
乞畀祠祿不允詔

勅具悉卿以膚敏之材通明之畧三踐常伯四尹神臯
維今同姓之英際遇寵榮未有出卿右者也固當視國

如家視民如身履盤錯而弗辭當怨誹而不懼使邦幣
無墮民食告充困窮有瘳愁歎寢息庶幾下足以塞都
人之望上足以寬當宁之憂朕之用卿意實在此若乃
規畫僅施而靡竟精神尚壯而懷歸政當游及方新之
初遽謂疆弩垂盡之末於義未愜難於勉從所請宜不
允奏劄云以大耗之精神當益難之事任云云強弩之
勢既盡雖穿縞有所不能駕馬之力已疲惟聞征則
以為喜

賜中大夫知樞密院事兼參知政事兼太子賓

容雷孝友乞畀祠祿不允詔

勅具悉朕惟古之大臣身任天下之重一夫不被其澤若已納之溝中未聞以獨善為高輕去就為潔也卿與聞機政三載于今孳孳服勤夙夜匪懈朕躬之所眷倚朝野之所觀瞻何嫌何疑迺求釋位書曰若游大川予往暨汝與其濟今中外多故民物未康貨幣之源尚埋甲兵之問日至朕方喟然當食弗御茲豈大臣求去時乎其思同寅協恭助朕所以憂此者以疾來諗所未欲

聞所請宜不允

賜中大夫知樞密院事兼參知政事兼太子賓客雷孝友再上奏乞許從罷免俾奉外祠不允不得再有陳請詔

勅具悉人主之用人非獨以榮其身大臣之事君亦將以行其志朕所為置卿於鼎鉉之貳屬卿以樞機之繁豈徒以高爵厚祿示眷寵之私蓋望其碩畫嘉謀裨經濟之用儻昧仰成之託輕懷勇退之高人其謂何朕復

奚賴宜思君臣同體之誼毋徇明哲保身之圖期素學之盡施雖告歸其未晚所請宜不允不得再有陳請

賜正議大夫守刑部尚書兼修國史實錄院修

撰兼太子詹事兼吏部尚書曾喚辭免除吏

部尚書恩命不允詔

勅具悉朕惟有周冢宰之職三公兼之所以統百官均四海非他卿比也若稽古神祖俶定官制為一王法天官常伯位叙尤高迄于元祐非執政舊臣不在茲選朕

更新萬化于今三年真拜是官四人而已顧不重哉卿
方嚴簡重有先正之風忠亮篤實為邇臣之表間以大
司寇兼銓衡鑒裁之公達于朕聽予維寵嘉之即命
為真非卿誰可覽觀來奏殊異所聞謂方斲去之堅懼
有圖逸之誚夫引疾以自閒卿志也登賢以自近朕心
也卿欲必行其志獨不當體朕惓惓之心乎亟其祇欽
毋違朕命所辭宜不允

賜新除資政殿學士中大夫知興元府克利州

路安撫使四川制置大使安丙再上奏劄子
辭免資政殿大學士知興元府四川制置大

使不允詔

勅具悉朕以卿有捐軀殉國之忠有戡難靖民之畧誠
節昭著勲庸赫然久欲過山甫之歸重拂借寇君之願
故易宣威而開制阨仍秘殿而加大名所以聳遠人之
瞻重全蜀之體也夫功崇則賤厚勞大則報疊此有國
常典而卿辭之至再何耶勉循已定之規想建無窮之

利使邦人懷葛亮之愛而夷俗畏德裕之威豈不韙哉
所辭宜不允

賜揚州觀察使知婺州軍州事兼管内勸農使
善下乞依舊在京宮觀免奉朝請任便居住
不允詔

物具悉朕惟治親治民之道一而已矣卿往司屬籍既
能使國之子弟知孝悌忠信之美今守藩輔獨不能使
郡之衆庶興禮義廉遜之風乎民苟相安卧治可也遽

求閒退非朕所期所請宜不允

賜寶謨閣學士正議大夫知紹興府黃由辭免
除刑部尚書兼直學士院日下前來供職恩
命不允詔

勅具悉故舊弗遺所以厚風俗老成並用所以重朝廷
卿早冠倫魁有洋洋仲舒之對曩事潛邸有閭閻史魚
之風蓋孝宗所擢以遺後人而光考所知以傳台德越
在外服既多歷年問秦府之故僚靡忘注想奉會稽之

計最式佇來歸還登文陛之班兼峻玉堂之直惟心乎
仁恕必能迪朕德之好生惟老於詞章必能代予言而
作命亟承茂渥來若嘉猷所辭宜不允故茲詔示想宜
知悉

賜正議大夫參知政事兼太子賓客樓鑰乞仍
舊致仕歸伏田里不允詔

勅具悉朕觀商周之書其圖任必曰舊人御事必曰耆
壽下至秦穆悔過自誓亦知謀于黃髮則罔所愆老成

之士為國重輕其已久矣蓋閱歷多則舉措審見聞博則策慮精德望孚則人心服朕虛懷前席以致諸老意實在此卿醇深之學高視當世剛毅之節自期古人而制行適於安和持心本於忠厚多士之望歛然宗之高卧十年肯為朕起海內屬目欲觀所為方資帷幄之籌遽動丘園之興豈朕尊禮者哲有未至歟不然何去之果也夫七十之致仕雖著于經二三大臣難拘此制卿昔代言嘗以是卻臣鄰之請矣豈今日遂忘斯誼乎而

況以志御氣則何戒得之嫌以道應物則奚不能之懼
勉行所學永底厥成所請宜不允

賜正議大夫參知政事兼太子賓客樓鑰再上

奏劄子乞旋歸田里再挂衣冠不允不得再

有陳請詔

勅具悉朕惟老成之重中外所宗聲色不形觀聽自服
卿學醇行勁天下謂之正人心平氣和時論稱其長者
屬予更化之日起爾謝事之餘出入三年踐更二府雖

彌縫輔贊初無可見之功而緝熙調娛自有不窮之益
况昔者三賢之偕召而今焉一老之僅存殆上天留以
輔予俾斯世臻于極治倚毗方切去就豈輕獨靈光歸
然庶幾為魯國之鎮從未松游耳難遽遂留侯之心宜

體至懷勿厪屢請所請宜不允不得再有陳請

元奏云
雖號參

知了無裨補彌縫輔贊何所建明拜跪步趨率皆強勉
十日所視一心靡寧矧同召之三人今惟存於隻影覩
顏在列歸
夢無形

賜保康軍承宣使左驍衛上將軍鎮江府駐劄

御前諸軍都統制兼知揚州軍州事充淮南
東路安撫使節制淮東軍馬畢再遇乞界一
在外宮觀差遣不允詔

勅具悉朕以卿有折衝禦侮之材故畀卿以牧人御衆
之任注懷既厚屬望豈輕迺者盜發所臨聲搖旁郡迄
憑指縱屢以捷聞朕方操予奪之柄以馭臣明賞罰之
公以示信爾庸既茂方且圖之何疑上章欲賦祠廩况
今創殘未復愁歎尚殷還定撫摩責在師帥久勞念佚

他人可也豈所期於將軍者哉所請宜不允

賜通議大夫試戶部尚書兼詳定勅令官沈誥
乞還官政退老丘園不允詔

勅具悉朕惟文昌喉舌之司蓋以侍從論思為職以卿
老成直諒擢在此官庶幾輿論嘉言日裨予聽而無故
告去其謂朝廷何夫年高任劇固非優賢閔勞之意然
事有緩急義有輕重方時多虞用度百出雖吾二三執
政之臣未免日親錢穀之問而卿遽求自佚可乎當毋

愛一身之勞庶少寬百姓之急大義如此卿其思焉所請宜不允

賜太中大夫尚書戶部侍郎兼詳定勅令官沈作賓乞畀外祠不允詔

勅具悉廼者地官以缺貳聞顧瞻在廷弄印莫畀而獨起卿以家食擇材而任蓋不輕也卿既為朕來矣顧不能舒徐歲月以副朕責成之意可乎今公私匱急誠如來奏苟吾有司審盈虛知取予雖未能使國有九年之

蓄猶可使民受一分之賜也諉曰不可為而釋位以求
去是豈近臣體國之誼哉與其懲前事以自全不若勵
新庸而圖報歸榮之請其止勿言所請宜不允

西山文集卷十九

欽定四庫全書

西山文集卷二十

宋 真德秀 撰

翰林詞草

答詔

賜起復正議大夫右丞相兼樞密使太子少師史
彌遠辭免以皇太子冊寶推恩特轉一官恩命
不允詔

勅具悉朕承宗廟之重惟稽古建我元子于東宮粵二
年秋躬即大慶行冊命禮鐘鼓在虛衣冠在廷洋然和
氣充塞上下俾朕得以垂萬世休無愧祖宗付託之懿
者皆吾大臣輔贊力也卿以宏深正大之學端亮純一
之誠夙簡朕心從游資善迪我儲德底于光明密決大
計以安天下遂繇賓傅升亞維師教諭德成既顯且久
第進一官朕意猶憚亟祇渙恩母遣成命所辭宜不允
賜中大夫知樞密院事兼參知政事兼太子賓

客雷孝友通奉大夫參知政事婁機正議大
夫參知政事樓鑰中大夫同知樞密院事章
良能端明殿學士通議大夫簽書樞密院事
宇文紹節辭免皇太子受冊命了畢各與轉
一官恩命不允詔

勅具悉朕觀三代有道之長法重離繼照之象更化之
始首建儲闡宗祀之前舉行冊禮宏休懿鑠照映古今
神祇祖考莫不成喜卿等以股肱良弼兼組青宮既彈

出入諭教之勤復與周旋禮文之盛闕而不錄謂典章何傳不云乎太子正而天下定卿等有輔朕安天下之功矣而欲辭一秩之賞得乎亟其祇承毋或多遜所辭宜不允

賜正議大夫吏部尚書兼修國史實錄院修撰兼太子詹事曾暎辭免以皇太子受冊了畢本宮官吏等各與轉一官恩命不允詔

勅具悉朕更化之始建我元子于青宮屬卿來歸寘在

詹省以方嚴和裕之德翼恭敬溫文之美今三載矣冊
禮告成恩徧察案豈以端尹之重而可遺乎卿其祇服
徽章益思所以輔吾子固萬世磐石之基是惟朕屬任
之意控詞雖力義不可從所辭宜不允

賜朝散大夫試太子詹事兼同修國史實錄院
同修撰兼秘書監戴溪辭免該遇皇太子受
冊推恩特轉一官恩命不允詔

勅具悉日吾元子之在資善也卿以當世儒先橫帙左

右蓋於火然泉達之始已有日漸月漬之功越既升儲
徧歷宮室迪之以正心誠意之學勉之以居仁由義之
道從容啟沃裨益孔多朕方嘉爾之勞思所以表厲而
未遑也禮成增秩亦維其常何必撓謙留我成命所辭
宜不允

賜朝議大夫試尚書吏部侍郎兼太子右庶子
兼同修國史兼實錄院同修撰汪達辭免皇
太子受冊畢本宮官與轉一官恩命不允詔

勅具悉古之論教太子者必以選左右為急朕既參稽古誼正少陽之位又擇孝悌博聞有道術者以衛翼之唯卿以淵源純粹之學服在茲選實能以正言正行啟迪儲德國本彌固卿之力與為多焉典冊崇成例俾增秩雖名節自礪豈有望賜之心然功庸不報亦非待賢之誼往承朕命毋煩固辭所辭宜不允

來奏云辱在近臣當存體國之

誼敢同羣吏俱
懷望賜之心

賜端明殿學士提舉臨安府洞霄宮衛涇辭免

皇太子冊寶推恩以昨參知政事兼太子賓
客與轉一官恩命不允詔

勅具悉朕褒德錄賢不以新舊殊其禮論功行賞不以
中外二其心卿名高一時學貫千古捐身闢策力禪更
化之宏規造膝輸忠與決建儲之大議暨陟凝丞之任
首參賓交之聯正事正言效見聞而無隱重暉重潤資
啟沃以居多屬時典冊之告成載念勲勞之當紀豈其
居外而可遐遺第晉文階式昭春意毋徇謙撝之素亟

惟渙渥之承所辭宜不允

賜資政殿學士太中大夫知潭州充荆湖南路
安撫使衛涇上表再辭免更化之後親祀南
郊熙事備成慶均中外安丙衛涇俱以近臣
宣勞藩閫各特轉一官恩命不允不得再有
陳請詔

勅具悉昔周天子有事于先王於齊則賜之胙於魯則
歸之脤豈非股肱王室之重則當同其福祿之休日朕

禮典告成均慶中外維西有蜀維南有楚皆以近弼作
予元侯勲名爛然並著竹帛予維寵嘉之壬子制書命
進崇秩亦周褒齊魯之意也今卿抗章不拜顧以天道
虧盈為言夫五服五章以待有德雖云朕命實本天心
朕固匪出於私卿尚何辭之有所辭宜不允不得再有
陳請

賜資政殿學士通奉大夫知興元軍府事安丙
再上表辭免南郊慶成特轉一官恩命不允

不得再有陳請詔

勅具悉朕惟古者先成民而後致力於神故自更化以來分命邇臣付以藩閫俾之拊循兵民鎮奠疆場戎干載戢穡寶用成庶幾無外顧之憂矣於是於嘉壇秩元祀典禮具飭神人允諧顧惟屏翰之勞奚止駿奔之比此優隆之典所以獨施於吾重臣也今邊候底寧民物孔庶卿其益務綏靖以稱朕心命數之蕃方是茲始曾是一秩而可辭乎所辭宜不允不得再有陳請

賜中大夫權禮部尚書兼侍讀章穎乞許歸田
里不允詔

勅具悉朕觀昔者忠臣以言去國有留落不偶而終其
身者有投閒未幾而還踵登用者公道之開塞率於是
焉占之朕丕承祖宗崇尚謹直凡自初元以來繇論事
去者更化之後亦有存而未召召而弗用者乎惟卿塞
蹇匪躬名在諸儒之右首觸權倖一去十年越既來歸
寘在經幄從容獻替朕甚嘉之間由貳卿進攝宗伯鳴

珮澤笏出入闕庭使薦紳大夫相語曰此慶元諫爭之
臣嘗誑而復伸者也激高風而勵頽俗庶其在茲卿方
懷歸殊拂吾意所請宜不允

賜通奉大夫參知政事兼太子賓客婁機感疾
乞許納祿不允詔

勅具悉昔太公既老猶起海濱留侯雖病彊輔太子朝
有華髮之良國之福也豈以晦明風雨之不常而輕聽
其去哉已詔有司予卿朝謁之告卿其顯精神近醫藥

以自輔歸榮之請朕未欲聞所請宜不允仍給假十日
賜楊次山辭免新除少保進封永陽郡王加食

邑食實封恩命不允詔

勅具悉三孤之官貳公弘化朕未嘗輕以授人也而况
茅土之封自元豐命曹佺之後施諸后族越不過六七
人今朕因青宮冊禮之成既擢卿于亞保之位又以累
朝待元舅者可謂不世之榮殊常之遇矣非卿老成靜
重蔚有令德朕敢以天官為私寵乎往祇朕恩圖所以

稱此者循牆之避宜畧常文所辭宜不允

再賜楊次山辭免恩命不允詔

勅具悉昔在東都有賢戚曰陰識以椒房同氣之重而能謙冲自處為世祖所嘉尚每指之以勅戒貴戚激厲左右焉今朕有卿亦猶是也儲闈受冊推恩外家顧惟親賢疇出卿右三孤之拜王社之封所以褒表耆德為戚里勸也朕命不易毋庸固辭所辭宜不允

賜潭州觀察使知閤門事兼客省四方館事兼

提點御前忠佐軍頭引見司楊谷辭免皇太子受冊了畢除承宣使恩命不允詔

勅具悉朕嘗閱東都之史見明德馬后撫育儲嗣之功著在簡策焜耀來世未嘗不深嘉而屢歎也粵予元子蚤正春宮保惠扶持備殫勞悴皆至哉坤元之力其眈漢事尤有光焉典冊告成疏恩外屬惟卿伯仲夙著賢稱富貴無自滿之心忠孝有兼全之節若時留務實亞齋旒肆繇察庶並命褒陟書不云乎用德彰厥善朕之

寵卿蓋庶幾乎此卿其何辭所辭宜不允

賜朝請卽試尚書吏部侍郎兼修玉牒官兼侍

讀兼權給事中許奕乞川蜀待闕州郡差遣

不允詔

勅具悉昔蕭望之以諫官補郡吏不忘雅意之在本朝
呂元膺繇給事守同州復以謹言而留左右朕惟宣帝
憂民之切不如憲宗納諫之明若特近臣可使輕去卿
以有用之學不窮之材冠多士於臨軒之初踐禁涂於

更化之日其侍經幄以正道沃朕心其攝瑣闥以忠規
裨朕聽方有賴批鱗之直可遽為叱馭之行其安厥官
益勵爾操使朕無愧元和之主卿亦有光先漢之臣何
必守藩乃為報國所請宜不允

賜特進觀文殿大學士提舉臨安府洞霄宮錢
象祖上表再辭免特授少保依前觀文殿大
學士充醴泉觀使加食邑食實封恩命不允
不得再有陳請詔

勅具悉朕建儲之始稽用舊典命二三大臣並職輔導
于東宮卿以台衡之尊兼師傅之重須眉皓然衣冠甚
偉有如綺里之侍宴席閭閻惻惻屢有諫正又如張酺
之在經帷朕甚嘉之雖去國之久未嘗忘也肆因顯冊
之成命晉孤卿之秩詩不云乎無言不讐無德不報朕
心盖庶幾焉毋庸固辭拂我眷意所辭宜不允

賜正奉大夫守吏部尚書兼修國史兼實錄院
修撰兼太子詹事曾煥乞令謝事歸養沉疴

不允詔

勅具悉朕惟昔之賢哲輕棄軒冕勇往不回其說有二
或時君信道弗篤不足與有為或同列甚賢者多不去
則有咎故二疏享知止之樂香山全退傳之名今朕虛
已待賢常若弗及衆正在列不以小人參之士而無志
當世則已苟誠有志可失斯時况卿位冠從臣責任不
為不重職居宮尹寵遇不為不優一旦浩然欲去朝廷
而傲山壑固足以遂卿考槃之志獨不使朕獲權輿之

譏乎所請宜不允

賜起復正議大夫右丞相兼樞密使兼太子少

師史彌遠乞歸田廬補還服制不允詔

勅具悉在昔昌陵興帝王之業惟時趙普建社稷之勲
奪哀情於艱疚之初蠲起復於祥除之日未聞有請欲
許終喪茲故實之甚明在信書而可攷卿為碩輔繫國
世臣以忠純不二之心奮剛毅必為之節力陳至計正
儲闡少海之尊躬蹈危機安宗廟泰山之固粵從人望

登拜台司有調娛中外之功有經理久長之策豈容項步輕去朝廷矧禮極哀榮既事親而無憾則義均休戚在體國以宜先益堅致主之心庸副教忠之望所請宜不允

賜煥章閣學士通議大夫知江陵府充京西湖北制置使李大性辭免除寶文閣學士依舊知江陵府充京西湖北制置使不允詔

勅具悉朕惟荆襄上游屏蔽南服間者邊事之興被兵

為尤甚生齒流散田萊多荒蓋嘗喟然西顧而歎曰孰
能為朕勞徠還定俾復其舊乎卿以法從之英首任聞
寄撫柔遠近得江漢之心政聲流聞朕意以懌維昭陵
圖書之府邃在西清俾卿職其間庸示風勸徃服朕命
益綏吾民庶無負褒表之意尚何以辭為所辭宜不允
賜起復正議大夫右丞相兼樞密使兼太子少
師史彌遠再上奏劄子乞歸田里補還服制
依已降指揮不允不得再有陳請詔

勅具悉大臣之義與衆庶不同多事之時視承平亦異夫既任安危之責則當權輕重之宜卿世秉鈞衡望隆柱石以身殉國昔嘗捐家族而弗辭移孝而忠今可執親喪而為解矧歲月將臨於祥禫而哀榮備極於始終其在卿心夫復奚憾顧今朝廷之上有宵旰之憂朕方喟然思與濟此尚念倚毗之切勉恢康人之圖庶允答於民瞻亦有光於慈訓所請依已降指揮不允不得再有陳請

賜正議大夫參知政事兼太子賓客婁機年齒
衰耄疾病易生乞許納祿不允詔

勅具悉朕以卿為天下之老有大臣之風越從衆言擢
在二府所資從容論道之益非有奔走宣力之勞何為
上章欲致厥事昔畢公弼亮四世而克勤小物衛武九
十在位而以禮自防卿年雖高未至於是其思國計之
重甚于身謀民瘼之瘳急於已疾勉徇大義勿復有云
所請宜不允仍給假半月

來奏云有不
堪奔走之言

賜太中大夫守尚書戶部侍郎兼詳定勅令官
魚權工部沈作賓乞效官偏壘不允詔

勅具悉夫乘人之車者任人之患食人之祿者分人之
憂卿職在論思誼同休戚屬茲多事之際當以盡瘁為
心云胡上書遽欲自佚昔王事靡盬詩人不遑將母
之歎今卿所遇固異于斯進則啟沃朕前退則怡愉膝
下苟能報國自足悅親尚思勉於功名庶兼全於忠孝
所請宜不允

賜正奉大夫參知政事兼太子賓客樓鑰辭免

同提舉編修勅令恩命不允詔

勅具悉朕惟我朝之舊章最得先王之遺意以道揆權
法守故能脗合人情之公以儒者議刑名故能深原天
討之用長我王國不在茲乎卿蚤踐朝行久勤屬筆晚
參政路嘗與提綱惟心平可以酌律令之重輕惟學博可
以訂古今之沿革茲焉申命曷謂得人勉終已試之功
毋以不能為解所辭宜不允

賜華文閣直學士朝請大夫知福州充福建路
安撫使葉時乞畀宮觀差遣不允詔

勅具悉朕惟前日守將屢易之弊至於居官數月輒遷
有新故更代之煩而失上下相安之美朕甚厭之故嘗
深念縱未能復唐虞九載之制獨不可因任賜書如神
爵五鳳間乎卿性資粹明學問淵博項勞法從出鎮全
閩以忠厚及物之心施平易近民之政曾未期年遠近
愛之詩曰豈弟君子民之父母卿既庶幾乎此矣顧不

少留以綏朕赤子可乎勉安厥官毋拂朕指所請宜不
允

賜保康軍承宣使左驍衛上將軍鎮江都統兼
知揚州淮東安撫使畢再遇乞昇在外宮觀
差遣不允詔

勅具悉朕聞立功名易保功名難究觀往昔將帥之臣
克自祇畏雍容進退不失令名者曾幾人哉蓋矜功則
志易驕怙寵則身易危其勢然也卿拔自我行久董師

律威震夷貊勇聞江淮而能慕古人知止之風察天道虧盈之戒便朝入對亟請奉祠可謂善處功名之間矣然而旅力方剛精神尚強當勉未為之勲業益思無負於恩榮姑徐爾歸往聽朕訓所請宜不允

賜通議大夫試戶部尚書兼詳定勅令官沈詵乞檢會前後所奏俾令納祿不允詔

勅具悉朕以月正元日眡羣臣朝當三陽彙進之時惕然有感於易之泰曰內君子而外小人君子道長小人

道消也然則老成耆德之彥其可使之輕去也哉卿質直敢言清修有守方資雅望以重本朝矧蹇叔之力雖愆而楚丘之謀始壯尚其祗服毋替告猷所請宜不允

賜寶謨閣直學士中大夫知潼川府劉甲乞許納祿退安田里不允詔

勅具悉朕惟元祐忠賢之世鮮或有聞西州人物之宗今其餘幾卿洪毅有守篤實不欺器能適用於閒暇之時風節自持於變故之日頃繇南鄭易殿東川甫及期

年稔聞報政鄉閭非遠初何殊畫繡之榮精力尚強毋遽羨安車之樂勉綏民瘼庸副朕懷所請宜不允

賜端明殿學士通奉大夫簽書樞密院事兼太

子賓客宇文紹節乞昇祠祿不允詔

勅具悉朕聞為國者必有文武兼備之賢威名素著之彥使之端委廟堂圖議帷幄然後足以弭未形之患收無競之功卿器度恢洪材猷英特迺者總戎外聞風采隱然暨登樞庭備罄忠藎今雖潢池之警蕩滌有期朕

心所憂正在賊平之後維持鎮定方將與大臣圖之而
卿遽請奉祠以求自佚非所聞也矧卿德望並隆中外
所恃當身任經綸之責可輕為去就之謀勉聽朕言勿
廛再請所請宜不允

奏劄云今幸皇靈遠暢盜賊蕩
平甲兵之問浸已罕少云云

賜建武軍節度使鄂州江陵府駐劄御前諸軍

都統制鄂州駐劄王喜乞祠祿不允詔

勅具悉卿以西州拳勇之英名徹朕聽擁旄仗節極將
帥之榮必能忘身乃可報國今疆場晏然非有執干戈

援枹鼓之役也惟公惟廉以勤撫我士卒使戎政日肅
武備日修則優游折衝可以忘老遽求閒退非朕所期
所請宜不允

賜端明殿學士通奉大夫簽書樞密院事兼太
子賓客宇文紹節乞畀祠祿不允不得再有

陳請詔

勅具悉朕惟人主用賢之功必悠久而後見大臣體國
之誼豈進退之可輕卿靜重有謀沈深能斷自登簪橐

清華之選即值干戈倣擾之虞屏蔽江淮蕃宣襄漢牧
人御衆有寇恂之材治軍理民兼武侯之畧參稽輿論
擢貳樞庭鎮撫四夷正藉威名之素調娛萬務方觀智
識之長疊覽來章遽祈去位豈有能應變於昔者紛紜
之會而不能運籌於今茲閒暇之時舍朕而歸其義安
在尚念倚毗之切勉恢經濟之圖期斯世之舉安雖退
休其未晚所請宜不允

賜資政殿大學士中大夫知興元軍府事克利

州路安撫使充成都潼川府夔州路制置大
使安丙乞昇宮觀差遣不允詔

勅具悉朕慨念坤維邈在萬里非威名夙著不足以鎮
服物情非智畧有餘不足以酌酢事變故專任卿以一
面之責庶幾寬予西顧之憂遽覽來章首陳故實反復
申繹為之憮然知卿誠悃之深有如皦日顧朕倚毗之
切方若長城其體至懷少安厥位所請宜不允

秦劉云
祖宗舊

制不以蜀人
為大帥云云

賜武康軍承宣使殿前副都指揮使夏震納祿
不允詔

勅具悉卿誠於衛上為朕之信臣老於治兵為時之良
將既越衆人而登用豈容一旦以告歸矧今師律浸修
戎容載肅輕裘緩帶何禦侮之勞雅歌投壺有從軍之
樂縱令自佚何以過茲為國折衝盖無踰老臣者引年
謝事豈所圖將軍哉所請宜不允

賜正奉大夫參知政事無太子賓客樓鑰乞再

挂衣冠不允詔

勅具悉卿自去夏以來數致告歸之請矐言誠悃非不欲從顧念國計所關為說有二大臣之道固匪一端至於合和朝廷調一天下非存心忠厚如古之吉人持論寬平若漢之長者則不足與任此卿於二者蓋庶幾焉其不可去一也朝有大政國有舊章孰咨謀繫我元老其不可去二也今雖紀綱畧定中外向寧乃若建長策以起治功護元氣以固國脉兢兢業業正在斯時卿當

勉留力輔不逮遽求自佚朕何望焉所請宜不允

賜光祿大夫提舉臨安府洞霄宮張巖辭免復

資政殿學士依舊宮觀恩命不允詔

勅具悉朕惟皇建極以恕及人苟或取一節之長不暇
計平生之素其為忠厚殆過古初卿曩自周行躡登要
路方進長西樞之日蓋與聞北伐之謀雖不能折王恢
首事之非而粗知守魏絳和戎之利物論固多於歸咎
公朝寧過於用恩既予真祠復還舊職與人求備朕不

忍為居寵思危爾當知戒第堅圖報焉用控詞所辭宜不允

賜中大夫權禮部尚書兼侍讀兼修玉牒官章

頴辭免除禮部尚書兼職依舊恩命不允詔

勅具悉昔朕之就傅也先皇帝妙簡一時之望以從我于潛藩琢磨以道誼漸漬以經術蓋無異商宗之學甘盤漢皇之得四皓也今其存者尚復幾人登進褒崇詎容或後卿正大之學足以格君清修之行足以勵俗中

緣直道去國有年肆其來歸擢侍經幄閭閻惻惻動寓
忠愛眈前為有加焉文昌六卿禮最高選載疇已試即
念為真朕於敬故尊賢庶幾兩得之矣抗章求避豈所
圖於卿者哉所請宜不允

賜中奉大夫試尚書吏部侍郎兼太子右庶子
兼同修國史兼實錄院同修撰汪達辭免除
權工部尚書兼職依舊恩命不允詔

勅具悉朕惟士大夫有以風節自持道誼自任標望屹

然爲人物之冠者其在清明之世豈容進用之未至哉
卿以洪毅任重之資博洽多聞之學實似先正爲時名
流中緣直道見嫉羣枉澹然自守士論宗之更化來歸
寘在禁近朕心資其啟沃儲德賴其緝熙參稽師言擢
掌事典傳曰正臣進者治之表薦紳方屬目焉亟行所
知毋或多遜所辭宜不允

賜中奉大夫權工部尚書兼太子右庶子兼同

修國史兼實錄院同修撰汪遠辭免除權吏

部尚書兼太子詹事日下供職不允詔

勅具悉朕惟職總三銓文昌爲重地鄰六傳端尹爲高以卿項佐治官擅精明之譽久聯中護多輔導之功肆加二命之榮蓋極一時之選允諧衆望焉用宰辭夫綜叙人材不在身言書判之末緝熙儲德豈以章句文義爲先有雀毛之行然後足以銷浮競之風有園綺之實然後足以廣見聞之益非卿不能任此非朕不能用卿亟其祗欽益究所蘊所辭宜不允

賜正奉大夫參知正事兼太子賓客樓鑰乞致
仕不允不得再有陳請詔

勅具悉日卿引疾自言求釋政務朕嘗以二不可諭卿
矣今曾幾時復有是請夫正人治之表也耆艾民之望
也卿之在朝屹若山嶽鎮靜無作而羣目自瞻去就之
間其可以易昔楚立生有言使我拔距投石則固老矣
若深謀遠計則吾始壯也以卿之聰明疆力獨不當以
是自許乎勉為朕留毋復言去所請宜不允不得再有

陳請故茲詔示想宜知悉

賜正奉大夫守刑部尚書兼直學士院兼侍讀

黃由乞畀外祠不允詔

勅具悉朕聞遭時行道君子之盛心徇國忘家人臣之
大節故爵隆則務極其報任重則靡顧其私卿被遇祖
宗為時耆舊其在潛邸以三善而翼朕躬其居從班以
一言而平黨論雖屢更於藩屏每欽佇於儀刑比趣來
歸訢聞入告闡溫厚之文以華國典廣哀矜之指以洽

民心方懋簡知遽祈閒退夫朝廷之事重於閨門君臣之恩深於伉儷豈以悼亡之故遂虧盡瘁之忠勉服官常以慰人望所請宜不允

來奏臣妻胡氏今以疾亡云云

賜降授朝議大夫李璧辭免復元官宮觀恩命

不允詔

勅具悉朕惟公論所在未有久而不明人材實難弗忍使之終棄卿傳家之學貫乎古今憂世之心形於辭色曩參駁假屬值多虞處羣小橫流之中而有陰扶善類

之意當大權倒植之際而有密制元惡之謀况其遠返於虜庭嘗欲挽回於兵釁謂世讐固所當復而邊事豈可遽興至今斯言猶在朕聽迨奮投龜之決迄成解瑟之功稽其忠勤厥有本末茲博參於清議爰盡洗於丹書既復文階仍頒祠廩以示原情之典以隆念舊之恩毋庸控詞尚克知報所辭宜不允

賜寶文閣學士通議大夫知江陵府充湖北路安撫使充京西湖北路制置使李大性乞許

奉祠歸里不允詔

勅具悉卿鎮臨兩路出入四年雖用人之道勞佚宜均
顧制閫之權重輕所繫與其勉從雅志歸尋故里之安
孰若因任老成增長長城之衛矧卿負材獨異簡曠特
深父子一門繼處嚴徐之近侍弟昆三鎮雄分魯衛之
大邦恩隆則報稱宜先任重則倚毗滋厚尚體朝廷之
意益綏江漢之民式佇邁歸奚煩忱請所請宜不允

賜正議大夫兵部尚書兼詳定勅令官趙師昇

乞歸田里不允詔

勅具悉朕惟祖武之啟中興今垂百祀以宗盟而位常
伯僅止四人卿韞識通明負材超卓屢陟文昌之邇列
有光屬籍之前聞朕方招籲羣英作興庶事耆德之彥
猶多就列以赴功同姓之卿其可便私而去國尚勉靖
共之操以酬眷遇之恩何必告歸乃為知義所請宜不
允

賜朝議大夫權工部尚書兼同修國史兼實錄

院同修撰兼太子詹事戴溪乞納祿歸田里

不允詔

勅具悉昔漢戴憑以說經不窮居侍中之職晉戴逵以
守道難進論者以為宜備東宮之官朕惟卿學問淵博
號諸儒之宗履行端醇負當世之望是月擢登文昌兼
任詹省進則以忠規裨朕聽退則以經術輔吾兒朕之
待卿者蓋不薄矣云胡引疾亟欲求歸戴閱來章殊非
所望所請宜不允

賜太中大夫知樞密院事兼參知政事兼太子
賓客雷孝友乞奉外祠不允詔

勅具悉朕以涼菲之質日親萬幾賴輔弼之臣共為一體每推誠而任責期措世於丕平以卿剛毅質直有古人之風博厚魁闕有大臣之度擢在二府于今五年其於貌體之隆初無毫髮之間欲行所志可失斯時而卿何嫌何疑亟求於引去豈朕不明不敏弗足以有為聞之撫然甚用自媿矧今外虞雖弭而元氣未充多事甫

平而長策當建迨天之未陰雨宜謹豫防若水之無津
涯政須同濟往思底義勿復懷歸所請宜不允

賜正奉大夫守刑部尚書錄直學士院兼侍讀

黃由乞歸田里不允詔

卿昔事潛藩居多忠益暨登法從厥有仁言當重華違
豫之時朕獲以綠車入侍伊誰抗議卿實開先此其有
功國家者一迨夫權臣竊柄私意日滋羣邪翼之和附
如響而卿獨陳正論以鈞黨之禁為不可興深遏衆言

以發策之釁為不必問此其有功士類者二夫上則效忠於君父下焉弭禍於縉紳有臣如斯朕所嘉賴文昌帥屬經幄待言止須老成宿望之英日有直亮多聞之助舍朕而去於義可乎所請宜不允

賜觀文殿學士金紫光祿大夫何澹再辭免差
知江陵府恩命仍乞祠祿不允不得再有陳
請詔


勅具悉昔周公以叔父之尊而分陝服畢公以四朝之

弼而尹東郊古之大臣宣力王室潤澤生民不以老壯
二其心蓋如此卿時之舊德國之宗工出處之間輕重
所繫茲庸畀卿上流之寄庶幾寬予一面之憂謂宜遄
驅乃以疾諗當時寒而遠役朕固有惕于中為民瘼而
一行卿亦何辭之有亟承詔諭勿重有陳所辭宜不允
不得再有陳請

賜朝議大夫試尚書吏部侍郎兼中書舍人兼
太子右庶子兼同修國史實錄院同修撰曾

從龍乞畀祠祿或待闕便鄉州郡不允詔

勅具悉朕觀周公立政之書左右常伯其惟吉士考賈
誼治安之策輔導太子必以正人卿性資端良學行醇
茂持衡銓部共稱鑒裁之公橫帙諸闈居多啟沃之助
雖當盛年晉用之日蔚有碩德老成之風方懋簡知豈
容輕去况進則雍容于禁闈退焉密勿於親遑顧非有
北山之勞初何廢南陔之養尚其祇服勿復言歸所請
宜不允



西山文集卷二十